

Zeitschrift: Thurgauer Jahrbuch

Band: 42 (1967)

Artikel: De Schlungg

Autor: Nägeli, Ernst

DOI: <https://doi.org/10.5169/seals-699580>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 07.08.2025

ETH-Bibliothek Zürich, E-Periodica, <https://www.e-periodica.ch>

DE SCHLUNGG

E Swinger-Erinnerig

Im turnerische Vorontericht hät üs de Kursleiter meischtens mit liechtathletische Uebige beschäftiget, mit Hochsprung, Wytsprung, Laufe, Chuglestoße ond mit Freiüebige. Etlech vo n is hand aber fascht no meh Freud am Schwinge gha. Wenn d Swinger vom Turnverein i d Hose gstege send, hammer mit gröschter Spanig zueggueget. Wenn naame i de Nööchi e Schwingfeschtl gschift, semmer om de Sägmehlring ome gschtande, so nooch wie mer hand chöne, hand för der eint oder der ander vo de Swinger Partei gno, hand gfieberet, wenns denand in Greffe gha hand ond mit Lischt ond Chraft druf usggange send, de Partner uf de Rugge is Sägmehl zlegge. Mer hand druf gloset, wie die vom Fach gschwäzt hand, ond so hammer o bald ali Schwüng bim Name gchennt ond üs gmerggt gha, wie me s macht ond wie me s nöd sött mache.

Üser par send mengmol noch de Turnschtond im Vorontericht in Schwingcheller abe, send stolz i d Hose mit em omeggrädlete Zwilech gschloff, hand de Lederrieme om de tünn Buuch zeme zoge bis is letscht Loch, send uf enand zueggange, hand denand guet aagglueget, hand Greff gfaßt, hand de Verschtand ond d Müüs aagschpanet ond hand probiert, denand is Sägmehl ztrugge. Mengmol ischt en eltere, rechte Swinger debi gschift, wo n is gueti Rootschleg gge hät; di eltere hand jo all wider jungi müene noochzüche, will noch etleche Jöhrli o di schterchschte usgschwunge hand. An vo üs Junge hät vo sim Vatter sogär e Swingerbüechli gha, wo mit Photene ond Zeichnige ali Schwüng beschrebe hät. Da hammer gnauer studiert als d Schuelbüecher. Wen is mengmol noch em Schwinge en Arm oder en Achsle wehtue hät, so hammer da in Chauf gno, s hät zom Schwinge ghört wie 's Sägmehl in Hose; wenns nünt oograds hett chöne n absetze, wär s Schwinge blos halbe so intressant gschift. Vo dene Sekundarschüeler, wo bim Vorontericht ond bim

Schwinge mitgmacht hand, ischt an, de Fritz Hösli, en Protz ond en Prali gsi. Er hät scho im sebe n Alter e Schwingerposchtur gha mit Müüs wie Bluetwörscht a de n Arme ond a de Baane, wenn er s' usetruggt hät. Er ischt schwär ond schtarch gsi wie n en Bär. Selte hät en an vo üs podiget. Wenn er o nöd gad flingg gsi ischt, so hammer en doch nöd möge glopfe, ond mer send em hoffniglos onderlege gsi. Ka Wonder, da n er bim Schwinge nie gnueg öbercho hät. Mer hand em de Schlungg gsaat, ond öppedie häts in ere schlechte Luune en Schlunggi drus gge. Wil de Schlungg de meischte öberlege gsi ischt, isch s em in Chopf gstege, s hät döt sowieso e chli meh Sägmehl als Scharfsinn gha, wie mer gfonde hand. Er hät ka Glegeheit verpaßt zom Zaage, wa n er för en Mordskärli sei ond dann er kan förti. Er hät blos d Chraft gha zom Schwinge, aber nöd de recht Schwingergeischt. Er ischt drom o bi sine Kamerade nöd biliebt gsi. Allzeme hand gmacht, daß ka Chretz mit em gha hand ond daß em nöd ime Stryt i sini Pratze ggroote send.

De Schlungg hät bsonders gern de Hansli Puur gfluxet, wil dä weder am Turne no am Schwinge Intresse gha hät ond sin Flyß vor alem uf gueti Schuelnote verwendet hät. De Schlungg hät all wider probiert, de Hansli, e prings Pörschtli, i d Wuet z bringe, daß zome Hoselopf chäm, aber de Hansli hät em die Freud nöd gmacht.

Bis emol ame Schuelexame. Der erscht Taal vom Exame ischt verby gsi ond mer hand Pause gha. Uf em Turnblatz osse hammer is erholt vo de Frööglerei vo Lehrer ond Inspeggter. De Schlungg, wo nöd gad gglenzt gha hät im Rechne, hät uf en ere andere Ebni wöle sini Schterchi zaage. Er hät de Hansli wider emol uf d Mugg gno. Wenn er wie de Hansli no im Schloof ond im Tromm wöör rechne, so chönnt er s vilecht o echli besser, hät er zuenem gsaat, aber er hei ka Loscht, mit eme Zellrahme im Grend omezlaufe.



Mit Müüse an Arme chäm me wyter; me müe nöd fortrene wenn am naamert e chli tüütlech aaluegi. «Maanscht nöd, Hansli?» hät er giftig gchöglet.

De Hansli ischt em Schlungg alewil usgweche, wenn dä hät wöle mit em aabendle; die Freud hett er em nöd wöle mache, dann er en hett chöne uf de Rugge legge oder soß mit siner Chraft blamiere. Hüt ischt aber uf aamol e Wuet in em ufgstege. Er ischt doo gstande wie de Tavit vor em Goliath. Er hät de Schlungg verächtlech vo obe bis one aaglueget ond hät si nöd imponiere lo vo de schöne nöüe Chleider, wo de Schlungg ufs Exame öbercho gha hät:

«Bloos di doch nöd uuf wie n en Frösch; di wöör i samt de nöüe Sonntighose in Dregg legge, du Schlunggi!»

Mer hand gschtuunet, wie küen danner hüt gsi ischt. Ond de Schlungg hät grüeft: «Also probiers, du Flüügedregg!»

Scho hands denand wie Swinger paggt. De Hansli hät mit ere Wuet, wie mer si no nie anem gseche gha hand, zueggreffe, hät de Schlungg a sine nöüe Chnühose paggt ond – rätsch hät er em en Schlanz dri gresse vo one bis zum Hender ufe. De Schlungg hät über da abe sini Greff fahre lo ond druf verzichtet, de Hansli z Bode z trugge; aber er hät em o nöd noch Swingerbruuch d Hand gge. Er hät sini nagelnöüe Hose mit dem lange nöüe Schlitz aaglueget. Mer Zueschauer hand dezue gglachet, wammer zum Muul uus proocht hand ond «Bravo, Hansli!» grüeft. Gad send der Inspeggter ond de Lehrer bi erem Pausespaziergengli öber de Turnblatz an is vorbycho, ond s hand gglueget, was doo so Loschtigs gäb.

«Wa hand er so z lache, Buebe?» hät der Inspeggter gfrööget. Statt er e n Antwort semmer usenand ggange, ond de Schlungg ischt elaa doo gstande mit sim Schlanz in Hose.

«Er ischt selber tschold!» hammer gsaat. «Er hät de Hansli wöle blamiere ond ischt jetz selber blamiert».

De Schlungg hät de Hansli nöd chöne zemetätsche vor em In-speggter ond em Lehrer. D Pause ischt verby gsi, ond er hät sin lange Schlanz a de nöüe Hose müene zemehebe, wo mer zom Abschluß vom Exame wider is Schuelzemmer ine send.